

# Per rinforzar ina pressa rumantscha surregiunala

Maisa rodunda davart las medias rumantschas organisada da la Pro Svizra Rumantscha

■ La Pro Svizra Rumantscha è da l'avis che la pressa rumantscha («il pled scrit») è da muntada centrala per la promoziun da la lingua rumantscha. Per la chapientscha vicendaivla entaifer la Rumantschia, per la qualitat schurnalistica e per cuntanscher in dumber minimal da lecturas e lecturs è ina gasetta surregiunala pli valorusa che organs regionalis. Per ch'ina gasetta rumantscha chattia en il futur puspè dapli lecturas e lecturs dovri dapli consequenza tar la derasaziun surregiunala ed ina meglra purschida online. Ina gasetta rumantscha sto producir cuntengns per tut las Rumantschas e tut ils Rumantschs che vivan en las valladas rumantschas ed ordaifer il territori da tschep en il Grischun u en la Bassa. Ina gasetta rumantscha duai offrir ina purschida online atractiva e gratuita. Idealmain vegnan ils cuntengns sin la plattform en il web purschids en furma multimediata: sper il text dovri era cuntengns dad audio e video atractivs.

## Gasetta surregiunala gratuita sin palpì ed en il web

La Pro Svizra Rumantscha propona ch'ina nova gasetta surregiunala rumantscha saja en mauns publics. Quai munta ch'i sto vegnir fundà in nov organ che edescha ina gasetta rumantscha. Quel maina ina redacziun che producescha agens cuntengns. Ultra da quai retira el era cuntengns da l'ANR e da RTR. I dat ina gasetta rumantscha gratuita sin palpì ed en il web per in e scadin. La gasetta vegn distribuida en tut las vischnancas rumantschas e bilinguas. En pli vegn ella distribuida cun boxas en las staziuns en las citads pli grondas en la Bassa. La gasetta po dentant vinavant vegnir abunada.

## Rinforzar la Agentura da novitads rumantscha

L'Agentura da novitads rumantscha porta vinavant ina rolla decisiva. Perquai èsi in-



La pressa quotidiana rumantscha duai vegnir mantenida e rinforzada.

dispensabel da rinforzar las resursas finanzialas e structuralas da l'ANR per pudair garantir la qualitat schurnalistica giavischabla. Il cussegl da fundaziun da l'ANR sto perquai definir cleramain ses basegns finanzials per far ina dumonda adequata al Chantun ed a la Confederaziun. Vinavant èsi impurtant che l'ANR rinforzia sia collavuraziun cun RTR: oravant tut per la preschientscha en il web e la furmaziun e scolaziun da personal. L'ANR duai era sclerir ensem cun la Lia Rumantscha sche il

mandat dubel da ses president dal cussegl da fundaziun è d'avantatg.

## Maisa radunda

En vista a la situaziun alarmanta da la pressa rumantscha ha la suprastanza da la PSR organisà il venderdi passà ina maisa radunda per discutir l'avegnir da la pressa rumantscha. Preschents èn stadas la Lia Rumantscha e represchentantas e represchentants da las differentas medias rumantschas: l'Agentura da novitads ru-

nantscha, La Quotidiana, Pagina da Surmeir, Posta Ladina, Radiotelevision Svizra Rumantscha.

A l'inscunter han ils differents acturs discutà en moda constructiva ed averta ils differents basegns e scenaris da la pressa rumantscha en il futur. Las organisaziuns preschentas èn sa decididas da cuntinuar cun la maisa radunda en in interval periodic. La Lia Rumantscha surprena l'organisaziun e la coordinaziun da las proximas maisas radundas.

## Lia Rumantscha duai surpigliar il timun

La Pro Svizra Rumantscha propona il suandant proceder sut la direcziun da la Lia Rumantscha: 1. La Lia Rumantscha pretenda cifras detagliadas da la Somedia. Ina finanziaziun intermediara supplementara en favur (indirecta) da la Somedia po mo succeder sche la Somedia dat invista detagliada en la contabilitad. La Lia Rumantscha chattia ina soluziun cun il Chantun, la ANR e la Somedia. Sche l'ANR u in nov organ surpiglia l'entira responsabladad redacziunala sto quel era esser editur da la Quotidiana. 2. La Lia Rumantscha tschertga ensem cun ils represchentants da la maisa radunda ina persuna che surpiglia il post sco manadra u manader da project dad ina nova gasetta rumantscha. En in emprim pass intradescha questa persuna ina retschertga tar las Rumantschas ed ils Rumantschs da tut las vegliadetgnas en tut las regions da la Svizra per eruir lur basegns en connex cun ina gasetta rumantscha. Uschia po ella definir il format da la nova gasetta. En in segund pass prepara questa persuna ensem cun las organisaziuns pertutgadas pass concrets per realisar il project.

3. Per l'elavuraziun dad in concept per ina nova gasetta rumantscha duai vegnir involvi in institut da publicistica universitar.

Ulteriuras infurmaziuns davart la PSR: [www.rumantsch.ch](http://www.rumantsch.ch)

## Pro Svizra Rumantscha

L'unìun Pro Svizra Rumantscha (PSR) è vegnida fundada l'onn 1992 cun la finamira da stgaffir ina gasetta quotidiana rumantscha. Dapi che La Quotidiana exista, sa deditgescha la PSR era dad auters projects en connex cun la promoziun da la lingua rumantscha.